

Gelagat Pengundi Dalam PRU-15 Di Kawasan DUN Tanjung Lumpur, Kuantan, Pahang

Voter Behavior In GE-15 In Area Of Tanjung Lumpur State Legislative Assembly, Kuantan, Pahang

Nurul Arfah Rosli
¹Junaidi Awang Besar

Program Geografi
Pusat Kajian Pembangunan, Sosial dan Persekitaran
Fakulti Sains Sosial dan Kemanusiaan
Universiti Kebangsaan Malaysia

Correspondence e-mail: ljab@ukm.edu.my

ABSTRAK

Setiap individu mempunyai gelagat atau tingkah laku yang berbeza tidak kira bangsa, agama mahupun kawasan sama ada bandar atau luar bandar. Tingkah laku pengundian merupakan bidang yang menjadi pertimbangan pengundi dalam membuat keputusan sama ada hendak mengundi atau tidak dan juga calon yang hendak dipilih. Pengundi juga diberikan hak untuk bebas bersuara dan mengeluarkan pendapat dalam suatu pilihan raya. Justeru, tujuan penulisan kertas kerja ini adalah untuk menganalisis gelagat pengundi dalam PRU-15 di kawasan DUN Tanjung Lumpur, Kuantan, Pahang. Kajian ini menggunakan kaedah kajian mengikut kesesuaian reka bentuk kajian iaitu melibatkan kaedah mengumpul data lapangan dan data berangka (data primer) serta kaedah mengumpul data sekunder. Antara kaedah mengumpul data primer ialah melalui soal selidik, temu bual dan pemerhatian di lapangan manakala kaedah mengumpul data sekunder pula merangkumi kajian kepustakaan dan kajian atas talian. Penganalisan data dilakukan melalui perisian Statistical Package for Social Sciences (SPSS). Hasil kajian mendapati sumber maklumat yang paling dipercayai adalah media elektronik iaitu 36 peratus. Seterusnya 96 peratus responden menyatakan bahawa mereka mengundi dalam PRU 2022. Responden juga menyatakan bahawa faktor paling utama pengundi memilih Parti Perikatan Nasional (PN) adalah disebabkan kepimpinan PN yang bersih dengan 62 peratus, manakala faktor paling utama pengundi memilih Pakatan Harapan (PH) kerana kepimpinan Dato' Seri Anwar Ibrahim (20 peratus). Seterusnya faktor paling utama pengundi memilih Barisan Nasional (BN) adalah kerana parti tersebut berpengalaman dalam mentadbir negara (18 peratus). Kemudian dari segi pilihan politik, 62 peratus responden menyatakan akan mengundi PN bagi kerusi DUN dan 58 peratus responden juga akan mengundi PN bagi kerusi Parlimen pada PRU akan datang. Kesimpulannya, kajian ini penting kerana dapat memperkenalkan dan memberi pendedahan kepada masyarakat dalam bidang geografi politik di Malaysia sekali gus dapat dijadikan sebagai rujukan kepada pengkaji lain bagi memperoleh maklumat mengenai geografi politik dalam negara ini.

Kata kunci: tingkah laku politik, parti politik, calon, pilihan raya, kerajaan

ABSTRACT

Every individual has a different behaviour, regardless of race, religion or area, whether urban or rural. Voting behaviour is an area that voters consider when deciding whether to vote or not and also which candidate to elect. Voters are also given the right to speak freely and express opinions in an election. Thus, the purpose of writing this paper work is to analyze voter behaviour in PRU-15 in the

state legislative assembly area of Tanjung Lumpur, Kuantan, Pahang. This study uses a research method according to the appropriateness of the study design, which involves the method of collecting field data and numerical data (primary data) as well as the method of collecting secondary data. Among the methods of collecting primary data is through questionnaires, interviews and observations in the field while the methods of collecting secondary data include library research and online research. Data analysis is done through software the Statistical Package for Social Sciences (SPSS). The results of the study found that the most reliable source of information is electronic media which is 36 percent. Next, 96 percent of respondents stated that they voted in the 2022 GE. Respondents also stated that the most important factor for voters to choose Parti Perikatan Nasional (PN) was due to the clean leadership of PN with 62 percent, while the most important factor for voters to choose Pakatan Harapan (PH) was because of the leadership Dato' Seri Anwar Ibrahim (20 percent). Next, the most important factor for voters to choose Barisan Nasional (BN) is because the party has experience in governing the country (18 percent). Then in terms of political choice, 62 percent of respondents said they would vote for PN for the state seat and 58 percent of respondents would also vote for PN for the Parliamentary seat in the next GE. In conclusion, this study is important because it can introduce and give exposure to the public in the field of political geography in Malaysia and thus can be used as a reference for other researchers to obtain information about political geography in this country.

Keywords: political behaviour, political parties, candidates, elections, government

1. Pengenalan

Malaysia merupakan negara yang mengamalkan sistem pemerintahan Demokrasi Berparlimen dan Raja Berperlembagaan. Sistem pemerintahan ini membolehkan rakyat membentuk parti politik dan mentadbir negara melalui pilihan raya umum. Pilihan raya umum dijalankan bertujuan melakukan pemindahan kuasa kerajaan secara telus tanpa melibatkan pertumpahan darah mahupun kekerasan. Suruhanjaya Pilihan Raya (SPR) merupakan badan bertanggungjawab menguruskan sistem pilihan raya. Ahli SPR dilantik oleh Yang Di-Pertuan Agong dengan nasihat Perdana Menteri setelah berunding dengan Majlis Raja-Raja. Antara peranan SPR ialah menyelia pendaftaran pengundi, menjalankan pilihan raya bagi Dewan Rakyat dan Dewan Undangan Negeri, mempersempadankan kawasan pilihan raya dan menguruskan pengundian melalui pos. Pilihan raya umum diadakan sekiranya parlimen terbubar apabila cukup tempoh lima tahun dan Parlimen atau Dewan Rakyat dibubarkan oleh Yang Di-Pertuan Agong mengikut budi bicara jika lebih awal dari tempoh yang ditetapkan.

Terdapat empat aspek gelagat pengundi termasuklah partisipasi atau penyertaan politik, persepsi atau pandangan politik, pengetahuan politik dan literasi atau kefahaman politik. Menurut Junaidi (2017), tingkah laku sering dimaksudkan sebagai faktor psikologi yang menjadi asas kepada kelakuan ruangan individu yang menekankan peranan kognitif dan faktor pembuat keputusan. Di Malaysia, bidang tingkah laku pengundian menjelaskan partisipasi dan persepsi pengundi terhadap proses pilihan raya serta pihak yang terlibat seperti Suruhanjaya Pilihan Raya (SPR), parti politik, calon, ahli politik dan media massa (Pandian, 2014). Pengundi mempunyai hak rakyat dalam memilih kerajaan untuk memerintah negara tanpa sebarang paksaan daripada mana-mana pihak luar.

2. Sorotan literatur

Menurut Amani Dahaman (2011), ulasan literatur merupakan ulasan maklumat yang diperoleh daripada jurnal, buku, prosiding dan penyelidikan lepas (tesis) untuk sesuatu penyelidikan baharu. Dalam erti kata lain, ulasan literatur adalah pengumpulan maklumat penyelidik tentang permasalahan yang sedang dikaji. Ulasan literatur dalam kajian terbahagi kepada tiga bahagian iaitu politik pilihan raya luar negara, politik pilihan raya di Malaysia dan politik pilihan raya di Negeri Pahang.

Berdasarkan kajian politik pilihan raya luar negara yang bertajuk ‘Meramalkan Pilihan Raya dengan Twitter: Apa yang Didedahkan 140 Watak tentang Sentimen Politik’ yang dilakukan oleh Tumasjan et al. (2012), kempen Presiden Barack Obama pada tahun 2008 telah berjaya membuktikan bahawa media sosial menjadi bahagian penting dalam sejarah kempen pilihan raya Presiden Amerika Syarikat. Hal ini demikian kerana pelbagai platform seperti Facebook, Youtube dan Twitter digunakan untuk menyampaikan pendapat dan pandangan Obama mengenai isu penting kepada seluruh rakyat Amerika Syarikat. Beberapa penganalisis politik di Amerika Syarikat juga menyifatkan kemenangan Obama adalah sebagai satu tindakan yang bijak dalam memperoleh sokongan pengundi.

Satu kajian pilihan raya yang pernah dijalankan di Filipina menunjukkan sistem demokrasi tidak sepenuhnya berkembang apabila kekal dikuasai oleh elit politik melalui 3G (senjata api, peras ugut dan emas) dan 3C (modal, kejahatan dan paksaan). Justeru kajian ‘Diaspora dan Demokrasi: Pengundian Tidak Hadir Luar Negara, Pilihan Raya, dan Cabaran untuk Demokrasi yang Berfungsi di Filipina’ yang dilakukan oleh George Alarcon Jr. (2012) ini menunjukkan calon yang lebih berkualiti dilihat menghadapi kesukaran untuk bertanding sekali gus menyebabkan calon yang sama kekal dipilih dalam pilihan raya tersebut.

Thananithicot (2012) dalam kajiannya yang bertajuk ‘Penglibatan Politik dan Penyertaan Warga Thai: Ketaksamaan Luar Bandar’ menjelaskan bahawa tingkah laku pengundian di kawasan Bangkok, Thailand serta kawasan lain mempunyai perbezaan yang jelas kerana perbezaan persepsi yang wujud dalam kalangan masyarakat. Hasil kajian mendapati kawasan Bangkok merekodkan bilangan keluar undi yang rendah kerana mereka memandang sinis kepada sistem demokrasi. Masyarakat luar bandar pula menunjukkan bilangan keluar antara yang tertinggi kerana manfaat yang akan diterima sama ada dari segi ekonomi mahupun sosial daripada elit politik.

Kajian geopolitik antarabangsa yang lain adalah Michael Johnston (2013) dalam kajian ‘Lebih daripada perlu, Kurang daripada mencukupi: Pendemokrasian dan Kawalan Rasuah’ mengenai sistem pilihan raya pelbagai parti seperti di negara Great Britain yang menyifatkan kempen tempatan mampu memaksimumkan bilangan kerusi yang dimenangi. Tumpuan kajian ini adalah di kawasan yang berkemungkinan untuk menang bagi memastikan penduduk menyedari konteks tempatan dan prospek pilihan raya parti. Pengundi juga berpeluang menilai kemenangan sesebuah parti, mengetahui keadaan tempatan dan menilai keberkesanan kempen yang dijalankan sehingga mampu menghasilkan kemenangan. Hasil kajian menunjukkan analisis pilihan raya di Great Britain mempunyai penilaian yang tepat terhadap sesebuah parti politik yang bakal menang. Namun, keadaan sebenarnya adalah berbeza kerana mereka yang dikunjungi sesebuah parti politik lebih cenderung memperoleh kemenangan daripada rakyat berbanding parti politik yang tidak membuat kunjungan terhadap masyarakat.

Kajian politik luar negara berdasarkan yang dilakukan oleh Alex Marland dan Tom Flanagan (2013) bertajuk ‘Parti Baru: Penjenamaan Politik dan Parti Konservatif Kanada’ menyatakan bahawa pada tahun 1961 parti politik telah diubah suai daripada Parti Reformasi Kanada kepada Parti Perikatan Konservatif. Pengubahsuaian ini pada masa yang sama telah menambah baik imej awam, reputasi, kedudukan kompetitif dan hubungan emosi. Parti ini telah melaksanakan pembaharuan dari segi penghasilan logo dan pemilihan warna yang

sesuai di bawah kepemimpinan yang baharu. Pengiklanan atau pemasaran telah dijalankan secara meluas bagi memperkenalkan parti politik baru ini yang turut memaparkan imej visual yang menarik. Selain itu, ia juga menyusun strategi dalam menerapkan nilai estetika dan patriotisme supaya dapat menarik perhatian pengundi terhadap penjenamaan politik baharu. Penyelidikan ini juga menerangkan konsep penjenamaan politik dan seterusnya mengumpulkan data melalui kaedah temu bual supaya melihat pandangan tentang penjenamaan dalam politik di Kanada.

Kajian luar negara yang dilakukan oleh Dita Setya Budi P. (2014) dalam kajian ‘Geografi Politik Terhadap Perubahan Perolehan Suara Parti Demokrat pada Pilihan Raya 2009 dan 2014 di Kabupaten Pacitan, Indonesia’ menjelaskan tentang perubahan sebaran dan perolehan suara dari Parti Demokrat. Selain itu, kajian ini dilaksanakan bagi mengetahui hubungan antara faktor geografi dengan perolehan suara Parti Demokrat pada tahun 2014 di Kabupaten Pacitan. Hasil kajian mendapati faktor jumlah penduduk perempuan merupakan faktor geografi yang paling berpengaruh. Di samping itu, penduduk yang berumur 17 hingga 25 tahun juga mempunyai pengaruh yang kuat terhadap perubahan ini. Namun begitu, faktor ini dilihat tidak memberi kesan yang besar terhadap perubahan perolehan suara Parti Demokrat di Kabupaten Pacitan begitu juga dengan faktor kepadatan penduduk. Oleh itu, kepadatan penduduk, jumlah penduduk desa dan jumlah penduduk bandar tidak memberi pengaruh yang besar terhadap perubahan perolehan suara dari Parti Demokrat pada tahun 2014 kerana ketiga-tiga faktor ini tidak memiliki ciri yang khusus dengan suara Parti Demokrat.

Kajian politik di Malaysia dilakukan oleh Junaidi et al. (2014) bertajuk ‘Pilihan Raya Umum (PRU) 2013 di Malaysia: Suatu analisis ‘tsunami politik bandar’ menyatakan Pilihan Raya Umum (PRU) pada tahun 2013 merupakan PRU paling sengit dalam sejarah. Walaupun dalam PRU ke-13 ini BN berjaya mengekalkan status quo di peringkat nasional namun mengalami penurunan penguasaan jumlah kerusi di kedua-dua perwakilan tersebut. BN juga seterusnya gagal mendapat majoriti dua pertiga kerusi Parlimen selain tumpas di Pulau Pinang, Selangor dan Kelantan. Lebih menarik apabila Pakatan Rakyat (PR), berjaya menguasai 12 daripada 14 kerusi Parlimen. Tsunami politik bandar berlaku disebabkan oleh faktor akses pengundi bandar kepada sumber maklumat politik daripada media seperti facebook, twitter, laman web, blog dan juga SMS serta sokongan padu pengundi etnik Cina dan sokongan pengundi muda kepada PR. Kos sara hidup yang tinggi dan manifesto PR yang berjanji mahu menurunkan harga bahan api, menurunkan harga kereta, mewujudkan pentadbiran yang lebih adil dan telus juga menjadi faktor kemenangan PR dalam PRU ke-13.

Junaidi, Abdul Muein & Ahmad Afif (2018) dalam kertas kerja yang bertajuk “Gelombang Rakyat Dalam Pilihan Raya Umum (PRU) Ke-14, 2018 di Malaysia” menghuraikan bahawa tekad untuk jatuhkan BN, faktor ekonomi/beban/kos sara hidup rakyat, kerosakan imej atau personaliti/peribadi pemimpin dan parti, kesepaduan Pakatan Harapan, peranan media sosial, pengaruh Tun Dr. Mahathir, pengaruh 1.4 juta pengundi baru/muda dan perang persepsi telah berjaya membentuk satu gelombang yang akhirnya telah menumbangkan BN dalam PRU kali ini. PH berjaya menewaskan BN dan PAS pada peringkat kerusi parlimen dengan 122-79-18.

Junaidi (2018) dalam kertas kerja yang bertajuk “Analisis Faktor Geografi Terhadap Pola Pengundian Dalam Pilihan Raya Umum (PRU) Ke-14, 2018 di Malaysia” menjelaskan bahawa apa yang menariknya keputusan dan pola pengundian PRU 2018 ialah kemenangan parti yang bertanding dibentuk daripada faktor geografi yang terpisah antara satu sama lain. PH secara majoritinya menang di wilayah atau zon Pantai Barat Semenanjung Malaysia terutamanya di kawasan bandar dan separa bandar manakala PAS menang di zon Pantai Timur Semenanjung Malaysia manakala BN kekal menguasai kawasan luar bandar

terutamanya di negeri terkecil iaitu Perlis dan juga negeri terbesar di Semenanjung Malaysia iaitu Pahang. Harold (2018) menyatakan bahawa isu GST, skandal 1MDB, FELDA FGV, pemimpin kleptokrasi dan sebagainya telah membuka mata pengundi di negara ini dengan penuh berani untuk menyelamatkan negara dengan mengundi parti pembangkang terutamanya PH.

Menurut kajian ‘Perubahan politik dalam pilihan raya umum (PRU) ke-14, 2018 di Malaysia’ oleh Junaidi (2019) menjelaskan parti politik Barisan Nasional (BN) telah berjaya ditewaskan oleh parti pembangkang iaitu Pakatan Harapan (PH). Keputusan PRU 2018 mewujudkan satu gelombang besar iaitu rakyat sendiri telah beralih pilihan dengan mengundi parti pembangkang sekaligus memusnahkan penguasaan Barisan Nasional buat kali pertama sejak 63 tahun lalu. Faktor yang menjadi kekalahan kepada parti Barisan Nasional adalah seperti kempen pilihan raya dijalankan dalam jangka masa yang singkat, kos sara hidup yang meningkat, kerosakan personaliti pemimpin dan parti politik itu sendiri, faktor media sosial dan faktor ekonomi yang tidak stabil. Secara keseluruhan, perubahan politik berlaku disebabkan kuasa rakyat dalam memilih pemimpin serta gelagat pengundi yang berubah mengikut isu semasa melibatkan faktor sosial, politik dan ekonomi negara.

Junaidi (2023a) dalam artikel jurnal yang bertajuk “Pilihan Raya Umum Malaysia ke-15: Pola Sokongan Pengundi Berdasarkan Faktor Kewilayahan” menjelaskan bahawa PH terus menguasai wilayah Pantai Barat Semenanjung Malaysia serta di Sabah serta Sarawak di kawasan bandar dan separa bandar campuran etnik dan majoriti Cina, PN menguasai wilayah Pantai Timur dan Utara serta sebahagian kecil di Barat dan Selatan Semenanjung Malaysia di kawasan luar bandar majoriti Melayu iaitu di zon Semenanjung Pantai Timur iaitu Kelantan, Terengganu dan Pahang Timur serta Pahang Tengah; Utara Semenanjung iaitu Perlis dan Kedah serta Pulau Pinang Seberang Prai Utara dan Tengah, Perak Utara, Perak Tengah; sebahagian Barat Semenanjung iaitu Utara Selangor dan Barat Selangor serta Barat Melaka dan Selatan Melaka manakala BN kekal berkuasa di kawasan luar bandar tengah Semenanjung Malaysia namun dengan jumlah kerusi yang menyusut. Justeru, pengaruh kewilayahan turut mempengaruhi pola pengundian dan perlu diambil perhatian oleh pihak yang berkenaan untuk melaksanakan strategi kempen bagi mendapat sokongan daripada pengundi di kewilayahan berkenaan.

Junaidi (2023b) dalam artikel jurnal yang bertajuk “PRU-15: Tiadanya Parti Politik Yang Menang Majoriti Mudah 112 Kerusi Parlimen Untuk Membentuk Kerajaan Persekutuan Malaysia” menjelaskan bahawa keputusan PRU-15, 2022 menunjukkan tiadanya satu parti tunggal berjaya mendapat majoriti mudah 112 kerusi untuk menguasai Parlimen dan Kerajaan Persekutuan. Keputusan ini disebabkan kegagalan BN untuk memenangi majoriti mudah akibat peralihan besar undi Melayu kepada PN. Peralihan besar undi ini berfaktorkan kepada kesedaran pengundi Melayu untuk memilih parti politik dan pemimpin yang bersih dan dapat diharapkan memperjuangkan hak orang Melayu dan Islam. Hasil kebijaksanaan titah serta nasihat Baginda Yang Dipertuan Agong maka terbentuklah Kerajaan Perpaduan daripada 148 ahli Parlimen iaitu majoriti 2/3 daripada 222 ahli Parlimen Malaysia yang terdiri daripada PH, BN, GPS, GRS, WARISAN, KDM, PBM dan 2 orang ahli Parlimen Bebas. PN (74 ahli Parlimen) tidak menyertai Kerajaan Perpaduan dan bertindak menjadi pembangkang. Dengan itu juga, Dato’ Seri Anwar Ibrahim daripada PH telah dilantik sebagai Perdana Menteri Ke-10.

Kajian di negeri Pahang yang bertajuk Omar (2004), dalam kajian ‘Orang Asli Dalam Politik Dan Pembangunan Di Pahang.’ Memulakan analisis dengan melihat struktur politik masyarakat Orang Asli, penglibatan mereka dalam bidang politik serta pandangan dan pengetahuan masyarakat berkenaan tentang politik di Pahang. Analisis mengenai penglibatan serta pandangan dan pengetahuan masyarakat Orang Asli di Pahang berkaitan dengan

pembangunan juga diberi tumpuan. Selain dari aspek tersebut, kajian juga dilakukan dengan meneliti peranan kerajaan dalam membantu membangunkan masyarakat Orang Asli di Pahang.

Berdasarkan Kajian ‘Calon lama vs calon muda dalam Pilihan Raya Kecil kawasan Parlimen Rompin dan Parlimen Permatang Pauh 2015’ yang dilakukan oleh Junaidi et al. (2015) menyatakan bahawa bagi keadaan di Parlimen Rompin, pengundinya lebih mendahagakan perkembangan pembangunan kerana kebanyakan pengundi di Parlimen Rompin merupakan penduduk FELDA yang terdiri daripada FELDA Keratong 1 hingga 5. Selain itu, Parlimen Rompin merupakan kubu kuat bagi parti Barisan Nasional (BN)/UMNO. Parti tersebut telah mencatatkan kemenangan pada PRU-13 yang lalu. Menurut Shamsuddin (2016), perkembangan politik Melayu Pahang telah berlaku dari tahun 1955 hingga 1984. Perubahan yang berlaku adalah fasa perubahan kepada kemajuan politik terutamanya kaum Melayu dari sebelum dan selepas Tanah Melayu mencapai kemerdekaan.

Berdasarkan kajian bertajuk ‘Tingkah laku pengundi dan faktor kejayaan Barisan Nasional: Kajian kes FELDA Kuala Krau’ yang ditulis oleh Azman, Mohd Fuad dan Junaidi (2016) membincangkan berkaitan pengaruh identifikasi parti dan faktor mempengaruhi kelakuan pengundi. Sokongan kuat penduduk FELDA terhadap Barisan Nasional telah memberi kemenangan berterusan dalam mentadbir di kawasan tersebut. Kemenangan berterusan itu adalah kerana bakti yang ditaburkan serta janji yang ditunaikan dalam pembangunan sesebuah kawasan sama ada dari segi pembangunan politik, ekonomi mahupun sosial. Di samping itu, kemenangan adalah disebabkan sikap taat setia pengundi sebagai tanda penghargaan kepada kerajaan tersebut yang mentadbir negara selama 59 tahun. Kebanyakan pengundi di kawasan FELDA ini lebih mengutamakan pembangunan kawasan berbanding isu sensasi supaya kesejahteraan hidup akan sentiasa terpelihara.

Kajian yang dilakukan oleh Junaidi dan Mohd Fuad (2016) bertajuk ‘Peranan Pengundi Melayu Dalam Pengukuhan Hegemoni Politik UMNO Dalam Pilihan Raya Kecil DUN Tenang, Kerduau dan Merlimau’ menunjukkan sokongan terhadap UMNO adalah bergantung kepada pengundian yang dilakukan oleh kaum Melayu. Hal ini demikian kerana pengaruh kuat Melayu dan UMNO dalam politik negara dalam pada itu kebanyakan pengundi Melayu yang menetap di luar bandar hanya bergantung pada media arus perdana sebagai sumber informasi dan mereka hanya memandang UMNO/BN sebagai parti yang layak mentadbir negara dalam apa jua keadaan.

Nor Shafika (2018) dalam kajian senario politik pilihan raya dalam PRU-14 di kawasan DUN Damak, Jerantut, Pahang mendapati bahawa persepsi dan partisipasi responden di kawasan adalah berbeza-beza berdasarkan kepelbagaian latar belakang demografi dan sosioekonomi mereka. 50.0 peratus di kawasan kajian dikenal pasti bergiat aktif berpartisipasi dalam politik dengan mendengar ceramah politik yang dianjurkan semasa kempen pilihan raya. Pandangan mereka dalam politik tempatan ini juga dipengaruhi oleh sumber maklumat politik yang disampaikan dan 32.0 peratus responden menyatakan penggunaan media alternatif merupakan satu medium baru untuk mendapatkan sumber maklumat berkaitan politik kerana media ini boleh diakses oleh sesiapa sahaja dan 37.0 peratus responden menyatakan bahawa mereka paling mempercayai sumber maklumat politik daripada media elektronik. Dari segi sokongan kepada parti politik pula, majoriti responden menyatakan keyakinan rakyat terhadap pemimpin sedia telah terhakis dan jangkaan perubahan besar dalam politik tanah air akan berlaku pada PRU-14.

‘Persaingan PRU ke-14 di Pahang: Pengekalan status quo melalui pertembungan tiga penjuru’ yang ditulis oleh Muhamad Nadzri (2019) menjelaskan strategi memenangi kawasan legislatif yang secara tidak langsung telah dapat mengekalkan status quo di Pahang. Namun,

corak pengundian yang menolak BN di negeri itu adalah hampir sama di negeri Semenanjung Malaysia yang lain. Hal ini menyebabkan kerusi BN di Pahang khususnya di DUN semakin berkurangan dalam PRU-14. Malahan, persaingan tiga penjurong telah mempertahankan BN daripada dikalahkan dengan teruk di peringkat Parlimen dan mengekalkan kedudukannya sebagai kerajaan. Kesan daripada persaingan ini boleh ditelusuri daripada kedinamikan kewilayahan. Sistem pilihan raya selaras dengan agenda reformasi institusi kerajaan adalah penting dalam membentuk struktur politik yang adil dan demokratik.

Nurul Izzatie (2019) dalam kajian “Gelagat politik dalam Pilihan Raya Umum ke-14, 2018: Kajian kes di kawasan DUN (N.36) Pelangai, Bentong, Pahang” mendapati bahawa pengundi di kawasan tersebut lebih dominan dalam menyokong parti politik yang sudah lama memegang pemerintahan iaitu Barisan Nasional (BN). Pertukaran Kerajaan Persekutuan yang jatuh kepada Pakatan Harapan (PH) sedikit sebanyak mempengaruhi pengundian di DUN Pelangai namun BN masih dapat mengekalkan kedudukan. Kerajaan Negeri masih dipegang oleh BN kerana kepercayaan pengundi terhadap parti yang boleh membawa kemajuan kepada negeri. Kebajikan rakyat juga dijaga serta perkhidmatan yang ditawarkan dapat memuaskan hati rakyat. Kebangkitan PH dalam PRU kali ini memberi kesan terhadap kepimpinan BN dan Parti Islam Se-Malaysia (PAS). Untuk memenangi pilihan raya akan datang BN dan PAS perlu mengambil inisiatif dengan membuat satu gabungan supaya dapat mengambil semula tampuk pemerintahan negara.

Berdasarkan kajian yang dijalankan oleh Khalida Najwa (2021) yang bertajuk ‘Keperluan pengundi untuk mengundi di kawasan tempat bekerja: Kajian kes di kawasan Dewan Undangan Negeri (DUN) Tras, Raub, Pahang’ memperlihatkan hubungan geografi manusia antara ruang dan masa. Sebanyak 46 peratus responden lebih mempercayai sumber maklumat melalui media sosial. Tingkah laku pengundi pula dipengaruhi oleh faktor persekitaran termasuklah pilihan rasional, model sosiologi dan identifikasi parti. Responden memilih parti politik yang menekankan aspek kemanusiaan dan berpendapat mengundi di tempat kerja adalah lebih menjimatkan masa dan kos. Seterusnya, sebanyak 76 peratus responden bersetuju peranan Kerajaan Negeri Pahang dalam menangani isu penularan wabak penyakit COVID-19 dengan baik.

Menurut Junaidi (2022) daripada kajiannya ‘Pengaruh Geografi Dalam Pilihan Raya Kecil (PRK) 2020 Di Kawasan DUN Chini, Pekan, Pahang’ mendapati PRK dijalankan kesan daripada kematian penyandang ADUN Chini yang bernama Dato’ Sri Abu Bakar Harun pada 6 Mei 2020 akibat serangan jantung. Penduduk kawasan ini majoritinya terdiri daripada pengundi Melayu yang merangkumi kawasan skim FELDA, perkampungan tradisi Melayu dan perkampungan moden Orang Asli. Hasil kajian mendapati keputusan PRK DUN Chini 2020 telah mengekalkan status quo hasil daripada kemenangan BN. Kemenangan ini melibatkan faktor lokasi geografi, sentimen politik yang kukuh, semangat keMelayuan yang tinggi, dan kempen yang berkesan.

Kajian politik di negeri Pahang pula antaranya bertajuk ‘Pandangan Belia Terhadap Isu Sosioekonomi dan Politik di Kawasan DUN Peramu Jaya, Pekan, Pahang’ oleh Balqis Farhana & Junaidi Awang Besar (2022) yang membincangkan tentang golongan belia yang diberikan tanggungjawab untuk mengundi bagi menentukan kepimpinan negara. Sebanyak 68 peratus responden golongan belia yang mengambil tahu berkaitan isu semasa sosioekonomi dan politik manakala 38 peratus responden menyatakan faktor yang mempengaruhi pandangan mereka ialah media. Hasil kajian mendapati sebanyak 92 peratus responden bersetuju penggunaan media sosial seperti Whatsapp dan Facebook memberi banyak pengaruh untuk cakna terhadap isu sosioekonomi dan politik, manakala sebanyak 78 peratus responden bersetuju bahawa isu sosioekonomi dan politik mempengaruhi pilihan politik.

Sehubungan dengan itu, pandangan daripada golongan belia penting dalam konteks pembangunan masa depan.

3. Metodologi

3.1 Kaedah Pengumpulan Data

Kajian ini menggunakan dua kaedah iaitu data primer dan data sekunder. Data primer adalah data yang berasal dari sumber asli yang dikumpul untuk menjawab persoalan kajian (Rohana, 2003). Dalam bidang sains sosial, data ini dikumpulkan daripada individu, kumpulan fokus atau melalui panel pakar. Pengumpulan bagi data primer boleh dilakukan secara aktif mahupun pasif. Data primer ini dikumpul oleh pengkaji melalui proses eksperimental atau kajian lapangan seperti soal selidik mahupun *google form*, pemerhatian, temu bual dan kaedah lain yang sesuai. Data ini adalah sumber data yang tidak tersedia di dalam fail atau laporan mahupun dokumen, tetapi ianya datang terus daripada subjek kajian. Bagi penyelidikan ini, pengkaji menggunakan kaedah pemerhatian dan soal selidik atau *google form* serta temu bual dalam mengumpulkan data primer.

Soal selidik atau *google form* merupakan satu instrumen yang digunakan untuk mendapatkan maklumat yang terdiri daripada beberapa bahagian yang disusun mengikut objektif khusus kajian yang telah ditetapkan. Bahagian A pada kebiasaannya merangkumi maklumat berkaitan dengan demografi responden seperti umur, jantina, bangsa, pekerjaan, bilangan isi rumah dan lain-lain yang berkaitan. Bahagian B pula akan mengemukakan soalan berkaitan gelagat pengundi dalam PRU-15 di kawasan DUN Tanjung Lumpur. Gelagat pengundi ini melibatkan empat bahagian termasuklah partisipasi politik, persepsi politik, pengetahuan politik dan literasi politik. Oleh itu, sebanyak 50 borang soal selidik telah diedarkan kepada responden yang terpilih.

Temu bual adalah satu perbualan antara dua orang atau lebih antara penemu bual dan yang ditemu bual. Menurut Patton (1980), temu bual ialah satu cara penyelidikan untuk mendekati DUNia responden dan memahami apa sebenarnya yang difikirkan oleh mereka. Dalam konteks kajian ini, pengkaji telah menemu bual beberapa orang penduduk di sekitar Kuantan khususnya di kawasan DUN Tanjung Lumpur bagi mendapatkan maklumat yang boleh menguatkan lagi fakta dalam kajian yang dilakukan.

Kaedah pemerhatian ialah satu kaedah penyelidikan yang digunakan untuk mengukur pemboleh ubah penyelidikan. Pemerhatian juga merupakan kaedah alternatif yang ada dalam mengumpul maklumat atau pengumpulan data selain soal selidik dan temu bual. Kaedah ini secara tidak langsung mendatangkan kefahaman yang mendalam berkenaan maklumat yang dikumpul. Kaedah pemerhatian dilakukan semasa pengkaji turun ke kawasan lapangan. Kaedah pemerhatian ini dilakukan bertujuan untuk menentukan dan melihat sendiri gelagat pengundi dalam PRU-15 di kawasan DUN Tanjung Lumpur, Kuantan, Pahang. Gelagat pengundi ini meliputi penyertaan politik, pandangan politik, pengetahuan politik serta kefahaman politik. Oleh itu, pengkaji dapat membuat pemerhatian di sekitar kawasan Sungai Isap, Permatang Badak dan Bukit Ranganin untuk melihat sendiri gelagat pengundi dalam PRU-15 di kawasan DUN Tanjung Lumpur.

Kaedah seterusnya ialah menggunakan data sekunder. Menurut Sabitha (2005), data sekunder boleh dirujuk sebagai data yang telah dikumpul oleh pengkaji lain. Sebagai contoh, data yang lepas atau terdahulu dikumpul untuk tujuan kajian. Antara data yang tergolong dalam data sekunder ialah data yang diperoleh daripada kajian kepustakaan dan laman web.

Kajian kepustakaan ialah sebuah penulisan yang bertujuan untuk mengulas isi ilmu termasuklah penemuan kajian dan juga secara teori serta kaedah sumbangan mengenai sesuatu topik. Kajian ini akan menggunakan kajian berasaskan kepustakaan iaitu suatu kajian yang dilakukan untuk mendapatkan maklumat yang berkaitan tajuk penyelidikan dengan merujuk kepada artikel jurnal, tesis, buku, kertas seminar dan persidangan, laporan penyelidikan, laporan bulanan dan tahunan serta akhbar. Maklumat yang diperoleh akan membantu penyelidik dalam mengukuhkan lagi hujah yang telah dihasilkan dalam hasil dan perbincangan berdasarkan kepada objektif khusus kajian yang telah ditetapkan. Maklumat yang diperoleh membolehkan penyelidik membuat pilihan atau perbandingan antara satu maklumat dengan maklumat yang lain. Hal ini bertujuan memastikan data yang diperoleh bersesuaian dan bertepatan dengan kajian yang dijalankan. Perkara ini sangat penting kerana penghujahan yang akan dinyatakan tidak akan diragui dan dipertikai oleh penilai mahupun pengkaji pada masa akan datang. Maka dengan itu, kajian kepustakaan di Perpustakaan Tun Seri Lanang (PTSL) dan Pusat Sumber Pusat Kajian Pembangunan, Sosial dan Persekitaran (SEED), Fakulti Sains Sosial dan Kemanusiaan telah dilakukan untuk memastikan pengkaji memperoleh rujukan yang tepat dan cukup untuk menyokong hasil kajian yang diperoleh.


Penggunaan internet dilihat mampu membawa kita menyelusuri seluruh dunia untuk mendapatkan segala maklumat yang diinginkan tanpa sempadan. Lantaran itu, rujukan internet akan digunakan dalam kajian ini kerana dapat membantu penyelidik memperoleh dan mengumpul data serta maklumat yang berkaitan dengan kajian sama ada dari dalam atau luar negara. Antara maklumat penting yang boleh diperoleh dari internet termasuklah peta kawasan kajian iaitu melakukan carian di *google map* dan maklumat kawasan kajian melalui laman web Majlis Bandaraya Kuantan serta maklumat tambahan dalam *google scholar* dan Geografia UKM. Kajian atas talian turut digunakan oleh pengkaji dalam mendapatkan maklumat tambahan iaitu diambil dari sumber yang sahih dan boleh dipercayai. Sebagai contoh kajian atas talian seperti e-akhbar, blog, laman sesawang, *Instagram*, *Facebook*, *Youtube*, *Skype*, *Twitter* dan *Whatsapp*. Maklumat atas talian lebih mudah diperoleh di samping lebih terkini berbanding dalam bentuk salinan keras (*hardcopy*). Hal ini kerana, maklumat yang berada atas talian sentiasa dikemaskini dan terbaharu mengikut tahun.

3.2 *Analisis Data*

Analisis data merupakan suatu proses yang memerlukan pengkaji menganalisis data yang telah dikumpul hasil daripada soal selidik atau *google form* yang diedarkan kepada responden terpilih di kawasan kajian. Setiap analisis data dibuat dengan berpanduan kepada hipotesis kajian dan semua jawapan kepada persoalan kajian yang dijawab dengan menggunakan kaedah analisis. Kaedah analisis yang dipilih perlulah bersesuaian dengan pendekatan kajian yang dipilih. Kajian ini memerlukan teknik analisis data secara kuantitatif. Teknik analisis data bagi kuantitatif selalunya menggunakan analisis statistik. Setelah semua data diproses mengikut teknik yang dipilih, maka data akan dipersembahkan dalam bentuk jadual, graf dan carta. Penggunaan *Statistical Package for Social Sciences* (SPSS) digunakan untuk mendapatkan peratusan serta penggunaan *Microsoft Excell Worksheet* untuk menghasilkan graf. Dalam kajian tentang gelagat pengundi dalam PRU-15 di kawasan DUN Tanjung Lumpur, hasil pungutan data melalui soal selidik atau *google form* dijadikan sumber utama yang menjadi penggerak kepada penghasilan jawapan kepada persoalan objektif yang telah diwujudkan.

3.3 *Kawasan Kajian*

Pengkaji memilih kawasan DUN Tanjung Lumpur sebagai tempat melakukan kajian kerana ingin melihat sendiri situasi perbezaan fahaman politik yang berlaku di samping ingin mengetahui tentang gelagat pengundi di kawasan berkenaan. Selain itu, faktor tempat tinggal yang berdekatan dengan kawasan kajian akan memudahkan pengkaji untuk menemu bual dan mengedarkan borang soal selidik kepada responden. Pengkaji juga melihat bahawa kajian lepas berkaitan politik dan pilihan raya di DUN Tanjung Lumpur sangat kurang dijalankan dan keadaan ini telah menarik minat pengkaji untuk menganalisis situasi politik di kawasan tersebut. Kawasan kajian bagi penyelidikan ini meliputi tiga kawasan utama iaitu Negeri Pahang, Parlimen Kuantan dan DUN Tanjung Lumpur. Tanjung Lumpur merupakan sebuah bahagian pilihan raya negeri di Pahang, Malaysia yang mempunyai wakil di Dewan Undangan Negeri (DUN) Pahang dengan kod N.15 (Lihat Rajah 1).



Rajah 1: Peta Kawasan DUN Tanjung Lumpur, Kuantan, Pahang

Sumber: Diubahsuai daripada Suruhanjaya Pilihan Raya Malaysia (SPR) 2023

Kewujudan Tanjung Lumpur dikatakan bermula apabila sekumpulan perantau dari Terengganu yang menjalankan aktiviti menangkap ikan tertarik untuk membina penempatan di kawasan tanjung yang menghadap Laut China Selatan. Penempatan penduduk kawasan tersebut telah wujud sekitar awal tahun 1920 apabila lebih 500 rumah kayu bertiang dibina di pesisir pantai. Selain itu, terdapat juga masyarakat yang membina rumah di kawasan darat iaitu kira-kira 50 meter dari pantai dan kebanyakan penduduk ketika itu bekerja sebagai nelayan. Kedudukannya yang berdekatan dengan muara sungai Kuantan telah menyebabkan pantai tersebut berlumpur hasil pertemuan endapan lumpur sungai dan laut. Oleh itu, nama Tanjung Lumpur telah diambil bersempena dengan keadaan pesisir pantainya yang dipenuhi lumpur sedalam kira-kira satu meter.

Kajian ini dijalankan di kawasan DUN Tanjung Lumpur. Tanjung Lumpur mempunyai dua mukim iaitu Kuala Kuantan 1 dan Kuala Kuantan 2. Kuala Kuantan 1 terdiri daripada Kampung Peramu, Kampung Tanjung Lumpur, Kampung Anak Air, Kampung Sungai Soi, Kampung Kempadang dan Kampung Tanah Putih manakala Kuala Kuantan 2 terdiri daripada Kampung Sungai Isap. Bagi koordinat DUN Tanjung Lumpur ini berada pada 3° 43' 43" Utara, 103° 17' 51" Timur. Luas kawasan DUN Tanjung Lumpur ini adalah sebanyak 42 km². Kawasan ini mempunyai persisiran pantainya yang dipenuhi lumpur selain mempunyai tanah yang berpayau bakau dan gambut. Namun, kawasan ini masih dapat dijadikan sebagai pusat petempatan dan pusat komersial.

Kerusi N.15 Tanjung Lumpur memperlihatkan penguasaan BN/UMNO pada PRU-11, 2004 melalui Dr. Nasharuddin Zainuddin yang menang dengan majoriti 3,808 undi. Kemudian pada PRU-12, 2008, BN/UMNO terus menguasai kawasan ini melalui Wan Adnan Wan Mamat yang menang dengan majoriti 496 undi. Kemudian pada PRU-13, 2013, PAS mendominasi kerusi DUN tersebut selepas Ustaz Rosli Abdul Jabar meninggalkan DUN Paya Besar untuk bertanding Di DUN Tanjung Lumpur. Oleh itu, pada PRU-13, 2013, buat pertama kalinya beliau menang di DUN Tanjung Lumpur dengan majoriti 796 undi. Kemudian pada PRU-14, 2018 beliau terus menang di kawasan tersebut dengan majoriti 1,339 undi. Pada PRU ke-15, Ustaz Rosli Abdul Jabar sekali lagi tampil untuk mempertahankan kerusi di DUN Tanjung Lumpur mewakili PAS atas tiket Perikatan Nasional (PN). Beliau telah ditentang oleh tiga lagi calon iaitu Nara@Nikman Nordin dari BN/UMNO, Hajah Sabrina Md Yusoff dari PH/AMANAH dan Ab'Alim Ruslam Ahmad dari PEJUANG. Ustaz Rosli Abdul Jabar menang dengan majoriti 8,989 undi setelah memperoleh 16,669 undi. Sementara itu tiga lagi calon terpaksa akur dengan kekalahan ini setelah calon BN/UMNO hanya memperoleh 7,710 undi manakala calon PH/AMANAH dan PEJUANG masing-masing memperoleh jumlah undi yang kurang iaitu 5,796 dan 167 undi. Keputusan ini menyaksikan PAS/PN dilihat kekal menguasai DUN Tanjung Lumpur sejak menawan kerusi tersebut daripada BN/UMNO pada PRU-13 hingga PRU-15 iaitu selama 3 penggal berturut-turut. Peratus keluar mengundi adalah 80.5 peratus dan undi rosak adalah 306 undi. Calon PAS itu dilihat cemerlang dalam tiga edisi pilihan raya berturut-turut kerana berjaya mempertahankan kerusi yang dimenangnya hasil daripada gerak kerja kempen pilihan raya yang sistematik dan terancang. Pada PRU ke-15, PAS telah bergabung dengan PPBM untuk membentuk gabungan yang diberi nama Perikatan Nasional (PN).

4. Dapatan dan Perbincangan

Analisis kajian dilakukan dalam bentuk kuantitatif dan kualitatif bagi menghuraikan objektif kajian yang bertajuk “Gelagat Pengundi dalam PRU-15 di kawasan DUN Tanjung Lumpur, Kuantan, Pahang”. Objektif utama adalah mengkaji pilihan parti politik di kawasan DUN

Tanjung Lumpur serta menganalisis faktor pengundi mengundi yang melibatkan parti Perikatan Nasional (PN), Pakatan Harapan (PH) dan Barisan Nasional (BN).

4.1 Pilihan Parti Politik di Kawasan DUN Tanjung Lumpur

Sebagai seorang rakyat yang bertanggungjawab, rakyat seharusnya keluar mengundi bagi menentukan masa hadapan negara. Setiap pengundi mempunyai gelagat atau tingkah laku dalam sistem pilihan raya yang bakal dijalankan. Terdapat 3 parti politik yang perlu dipilih oleh pengundi untuk mengundi di kawasan DUN Tanjung Lumpur iaitu parti Perikatan Nasional (PN), Pakatan Harapan (PH) dan Barisan Nasional (BN).

Jadual 1: Pilihan parti politik di kawasan DUN Tanjung Lumpur

Bil	Parti politik	Peratus (%)
1	Perikatan Nasional (BERSATU & PAS)	62
2	Pakatan Harapan (PH)	20
3	Barisan Nasional (BN)	18
	Jumlah	100

Sumber: Soal selidik 2023

Jadual 1 menunjukkan pilihan parti politik di kawasan DUN Tanjung Lumpur pada PRU-15. Perikatan Nasional (BERSATU & PAS) merekodkan peratusan tertinggi iaitu sebanyak 62 peratus diikuti dengan Parti Pakatan Harapan (PH) sebanyak 20 peratus dan yang terakhir ialah Parti Barisan Nasional (BN) dengan jumlah sebanyak 18 peratus. Keputusan ini memperlihatkan bahawa Parti PN berjaya mempertahankan kerusi dun Tanjung Lumpur yang memang menjadi milik PAS pada PRU yang lepas. Hal ini ditambah lagi dengan golongan muda yang terpengaruh dengan slogan 'Pertahankan Kepimpinan Ulama' yang tular di aplikasi tiktok dilihat telah berjaya menarik minat golongan muda untuk mengundi PN berbanding BN dan PH.

4.2 Faktor Pengundi Mengundi Perikatan Nasional (PN) Dalam PRU-15

Parti Perikatan Nasional merupakan parti yang baru dibentuk iaitu pada tahun 2020. Parti ini mempunyai gabungan daripada 5 parti komponen iaitu Parti Pribumi Bersatu Malaysia (BERSATU), Parti Islam Se-Malaysia (PAS), Parti Solidariti Tanah Airku (STAR Sabah), Parti Progresif Sabah (SAPP) dan Parti Gerakan Rakyat Malaysia (GERAKAN). Parti gabungan ini diketuai oleh YB Tan Sri Muhyiddin Mohd Yassin. Berikut menunjukkan beberapa faktor yang menyebabkan pengundi memilih untuk mengundi Parti Perikatan Nasional (PN) dalam PRU-15.

Jadual 2: Faktor pengundi mengundi Perikatan Nasional (PN) dalam PRU-15

Bil	Faktor	Peratus (%)
1	Kepimpinan PN yang bersih	30
2	Pengalaman dan jasa ketika mentadbir negara ketika era Pandemik COVID-19	30
3	Kepimpinan Tan Sri Muhyiddin yang mesra rakyat (panggilan 'Abah')	10
4	Isu perkauman dan keagamaan	8
5	Manifesto pilihan raya PN yang dekat dihati pengundi	8
6	PN sebagai ganti kepada BN (UMNO)	6

7	Pengaruh media sosial PN (Tik Tok) yang berkesan	4
8	Kelemahan parti lawan	4
9	Tagline BEST (BERSIH dan STABIL)	0
10	Jentera kempen PN yang sistematik dan agresif	0
Jumlah		100

Sumber: Soal selidik 2023

Jadual 2 menunjukkan faktor pengundi mengundi Perikatan Nasional (PN) dalam PRU-15 di kawasan DUN Tanjung Lumpur. Peratusan tertinggi yang direkodkan dalam pemilihan parti tersebut mempunyai dua faktor dengan catatan nilai masing-masing sebanyak 30 peratus. Faktor tersebut adalah kepimpinan PN yang bersih serta pengalaman dan jasa ketika mentadbir negara ketika era Pandemik COVID-19. Hal ini disebabkan parti Perikatan Nasional yang tidak lagi disabitkan atas kes kesalahan jenayah atau dikenakan tindakan undang-undang sama ada penjara atau denda.

Selain itu, Parti Perikatan Nasional juga dilihat bijak menguruskan negara semasa pandemik COVID-19 melanda negara. Hal ini menyebabkan pengundi memilih untuk pengundi parti tersebut. Sebagai contoh, menetapkan Prosedur Operasi Standard (SOP) dalam menjalankan aktiviti harian sepanjang tempoh Perintah Kawalan Pergerakan (PKP) dan Perintah Kawalan Pergerakan Bersyarat (PKPB). Penyebaran penyakit tersebut juga dapat diatasi dengan penerimaan vaksin kepada orang awam seperti vaksin Astra Zeneca, *Pfizer-BioNTech* dan vaksin *Sinovac*. Sempadan negara juga dikawal dengan ketat selain melakukan ujian saringan supaya tiada kemasukan pelancong luar yang membawa coronavirus sekali gus meningkatkan lagi kadar jangkitan penyakit COVID-19.

Seterusnya, pengundi memilih Parti Perikatan Nasional disebabkan oleh kepimpinan Tan Sri Muhyiddin yang mesra rakyat (panggilan 'Abah'). Situasi ini dapat dilihat apabila beliau begitu prihatin dalam menyelesaikan masalah rakyat serta menjaga kebajikan mereka. Tambahan pula, pelbagai pakej rangsangan ekonomi seperti Pakej Rangsangan Ekonomi Prihatin Rakyat (PRIHATIN) pakej PEMERKASA dan Pakej Bantuan Perlindungan Ekonomi dan Rakyat Malaysia (PERMAI) diberikan kepada rakyat terutamanya kepada golongan yang amat terkesan dengan penularan pandemik COVID-19. Hal ini secara tidak langsung dapat meringankan beban kewangan dalam kalangan masyarakat yang terjejas semasa pandemik tersebut melanda negara.

4.3 Faktor pengundi mengundi Pakatan Harapan (PH) dalam PRU-15

Parti Pakatan Harapan mula dibentuk pada tahun 2015 dengan gabungan daripada Parti Tindakan Demokratik, Parti Keadilan Rakyat, Parti Amanah Negara dan Parti Pribumi Bersatu Malaysia. Parti ini diketuai oleh YAB Datuk Seri Anwar Ibrahim. Namun Parti Pribumi Bersatu Malaysia telah keluar daripada PH pada tahun 2020. Berikut menunjukkan beberapa faktor yang menyebabkan pengundi memilih untuk mengundi Parti Pakatan Harapan (PH) dalam PRU-15.

Jadual 3: Faktor pengundi mengundi Pakatan Harapan (PH) dalam PRU-15

Bil	Faktor	Peratus (%)
1	Kepimpinan Datuk Seri Anwar Ibrahim	32
2	Manifesto pilihan raya PH yang realistik	18
3	Parti berbilang kaum yang sesuai dengan komposisi etnik pengundi	16
4	Isu integriti dan kepimpinan yang baik	14
5	Kempen melalui media sosial (Twitter, Facebook dan Youtube) yang berkesan	8
6	Politik nilai (spt tatakelola yang baik, integriti, adil dan amanah)	4

	dalam PH diterima pengundi	
7	Simpati kerana PH dijatuhkan ketika Langkah Sheraton pada Mac 2020	2
8	Slogan 'Kita Boleh' yang meyakinkan	2
9	Retorik ceramah pemimpin yang mempesonakan	2
10	Kepimpinan yang bersih, berpengalaman dan muda/bertenaga	2
Jumlah		100

Sumber: Soal selidik 2023

Jadual 3 menunjukkan faktor pengundi mengundi Pakatan Harapan (PH) dalam PRU-15 di kawasan DUN Tanjung Lumpur. Faktor utama yang mendorong pengundi untuk mengundi Pakatan Harapan (PH) dengan mencatatkan nilai sebanyak 32 peratus adalah kepimpinan Datuk Seri Anwar Ibrahim. Hal ini demikian kerana kepimpinan beliau dilihat mampu menstabilkan ekonomi dengan cara menstruktur semula pembangunan dan melakukan kerja-kerja menaik taraf infrastruktur sedia ada. Selain itu, Datuk Seri Anwar juga dilihat profesional dalam menguruskan kewangan negara seperti membuat keputusan yang bagi mengecilkan saiz kabinet dan memotong gaji menteri. Beliau juga berjaya menarik pelabur untuk melabur di Malaysia seperti kemasukan pelabur dari China dengan jumlah pelaburan sebanyak RM170 bilion. Antara syarikat yang terlibat termasuklah sektor pembinaan, perumahan, pendidikan, teknologi, pertanian dan sumber tenaga.

Faktor seterusnya yang menjadi pilihan pengundi untuk mengundi Parti Pakatan Harapan adalah manifesto pilihan raya PH yang realistik. Antara manifesto yang dijanjikan adalah menambah program perumahan mampu milik dan mampu sewa, menyediakan subsidi minyak bersasar, mengembalikan kepercayaan terhadap institusi kehakiman dan perundangan, merangsang pelaburan serta mempermudah proses perniagaan dan perdagangan, memperbaiki kualiti pendidikan dan khidmat kesihatan dan memerangi jenayah dan gejala sosial. Hal ini menyebabkan pengundi mempunyai keyakinan dalam memilih Parti Pakatan Harapan untuk mentadbir negara kerana manifesto yang dekat di hati rakyat serta bersesuaian dengan masa kini.

Parti berbilang kaum yang sesuai dengan komposisi etnik pengundi yang merekodkan nilai peratusan sebanyak 16 peratus juga merupakan faktor yang menjadi pilihan pengundi untuk mengundi Parti Pakatan Harapan. Kerajaan Perpaduan yang diterajui oleh Datuk Seri Anwar Ibrahim dapat mengukuhkan lagi hubungan antara kaum di Malaysia dengan memberikan layanan sama rata seperti bantuan yang dihulurkan tidak hanya bertumpu kepada orang Melayu sahaja. Tambahan pula, tiada penindasan serta sentimen terhadap mana-mana kaum atau agama menyebabkan pengundi lebih yakin untuk mengundi PH. Kestabilan politik dapat dikekalkan yang pada masa yang sama pemimpin negara dapat menjalankan tadbir urus dengan baik.

4.4 *Faktor Pengundi Mengundi Barisan Nasional (BN) Dalam PRU-15*

Parti Barisan Nasional (BN) merupakan parti tertua di Malaysia yang dibentuk pada tahun 1969. Terdapat 3 parti gabungan utama termasuklah Pertubuhan Kebangsaan Melayu Bersatu (UMNO), Persatuan Cina Malaysia (MCA) dan Kongres India Malaysia (MIC). Parti ini diketuai oleh Datuk Seri Dr Ahmad Zahid Hamidi. Berikut menunjukkan beberapa faktor yang menyebabkan pengundi memilih untuk mengundi Parti Barisan Nasional (BN) dalam PRU-15.

Jadual 4: Faktor pengundi mengundi Barisan Nasional (BN) dalam PRU-15

Bil	Faktor	Peratus (%)
-----	--------	-------------

1	Berpengalaman dalam pentadbiran negara	42
2	Jasa BN dalam memajukan negara	30
3	Kesetiaan ahli parti	12
4	Berkhidmat kepada rakyat demi agama, bangsa dan negara	6
5	Inginkan Kerajaan yang stabil dibawah kepimpinan BN	4
6	Formula calon WALI iaitu ciri “winnability”, “acceptibility” dan “likeability”	4
7	Pengaruh 3M (Money, Media & Machinery)	2
8	Kepimpinan yang diyakini	0
9	Slogan ‘Kestabilan dan Kemakmuran’ yang diterima pengundi	0
10	Sederhana dalam urusan pemerintahan negara.	0
Jumlah		100

Sumber: Soal selidik 2023

Jadual 4 dmenunjukkan faktor pengundi mengundi Barisan Nasional (BN) dalam PRU-15 di DUN Tanjung Lumpur. Faktor utama dengan jumlah peratus sebanyak 42 peratus adalah kerana berpengalaman dalam pentadbiran negara. Seperti sedia maklum, Barisan Nasional merupakan parti paling lama berkhidmat kepada negara sehingga mencecah 60 tahun. Pengundi melihat rekod perkhidmatan yang cemerlang iaitu dengan pembangunan sosial dan ekonomi berkembang dengan pesat. Secara tidak langsung, parti tersebut dapat mengatur langkah dalam menangani masalah rakyat seperti memberi perkhidmatan yang selesa dari segi pendidikan, kesihatan dan utiliti disebabkan keputusan yang dibuat adalah berdasarkan pengalaman.

Faktor seterusnya adalah jasa BN dalam memajukan negara iaitu sebanyak 30 peratus. Antara jasa parti tersebut kepada rakyat dan negara termasuklah Bantuan Rakyat 1Malaysia (BR1M) bantuan persekolahan, program 1AZAM dan Perumahan Rakyat 1Malaysia (PR1MA). Antara projek besar yang memberi kemudahan kepada rakyat pula adalah pembinaan pengangkutan awam yang canggih seperti *Mass Rapid Transit* (MRT), *East Coast Rail Line* (ECRL) dan pembinaan kemudahan Pusat Transformasi Bandar (UTC) serta Pusat Transformasi Luar Bandar (RTC). Perkara ini menyebabkan pengundi lebih tertarik untuk mengundi parti Barisan Nasional (BN) berbanding parti lain.

Kesetiaan ahli politik juga menjadi faktor kepada pemilihan Parti Barisan Nasional di DUN Tanjung Lumpur dengan merekodkan sebanyak 12 peratus. Pengundi yang mengundi Parti BN berdasarkan faktor ini juga kebanyakannya terdiri daripada penduduk kawasan luar bandar yang terdiri daripada kaum Melayu serta beragama Islam. Hal ini kerana pengundi tidak mengambil tahu isu semasa dan hanya tetap dengan pendirian pilihan parti sejak zaman dahulu. Pengundi juga tidak mengambil kira kriteria calon serta manifesto yang dijanjikan sebaliknya hanya setia untuk mengundi parti Barisan Nasional tersebut.

Menurut Mohd Irfan Zamri selaku Naib Ketua Pemuda UMNO Kuantan menyatakan bahawa:

“Pada pendapat saya rakyat mengundi Perikatan Nasional (PN) dalam PRU 2022 adalah kerana berlakunya gelombang di mana golongan muda terutamanya yang berumur lingkungan 18 tahun dan pengundi kali pertama mengundi yang mudah terpengaruh. Kebanyakan daripada mereka tidak mempunyai pengetahuan mengenai politik, tidak mengenali parti politik serta tidak mengenali calon yang bertanding menyebabkan mereka mudah terpengaruh daripada media sosial. Tambahan pula, parti-parti lain iaitu Pakatan Harapan dan Barisan Nasional yang tidak menguasai media sosial sepertimana Parti Perikatan Nasional. Bagi faktor pengundi mengundi Pakatan Harapan pula adalah kerana setiap parti mempunyai *fixed deposit* masing-masing. Contohnya parti UMNO yang terdiri daripada 3 juta ahli, parti PAS mempunyai 1 juta ahli dan Pakatan Harapan yang mempunyai 700,000 ahli. Terdapat juga golongan pengundi atas pagar yang juga memperlihatkan calon Perdana Menteri

Pakatan Harapan yang lebih meyakinkan berbanding Parti Barisan Nasional yang tidak mempunyai calon Perdana Menteri yang tetap. Bagi Parti Perikatan Nasional pula menetapkan calon Perdana Menteri yang dilihat gagal mengawal situasi COVID-19 sepanjang 14 bulan. Barisan Nasional menjadi pilihan pengundi dalam PRU 2022 kerana keyakinan orang lama yang masih lagi berpihak kepada BN. Tambahan pula, Barisan Nasional pernah memerintah negara dalam tempoh masa lebih kurang 60 tahun dalam negara. Namun, apabila sampai satu tahap sesebuah parti perlu berehat, terpalit pula dengan isu dan konflik yang menyebabkan rakyat tidak senang dan tidak selesa. Namun, berdasarkan pengalaman yang lama dan kekuatan Parti Barisan Nasional itu sendiri, parti tersebut mampu untuk kembali memerintah negara pada masa akan datang.”

(Mohd Irfan Bin Zambri 19 Mac 2023)

Manakala menurut Mohamed Hafizal Haji Mohamed Shah (Naib Yang Dipertua PAS kawasan Kuantan), beliau menyatakan bahawa

“Saya berpendapat rakyat mengundi Perikatan Nasional (PN) pada PRU 2022 adalah kerana manifesto parti yang dijanjikan, kesedaran pengundi dan gelombang anak muda. Gabungan parti dalam Perikatan Nasional seperti PAS dan BERSATU juga menyebabkan pengundi memilih untuk mengundi parti tersebut. Seterusnya, bagi faktor pengundi mengundi Pakatan Harapan (PH) dalam PRU 2022 adalah kerana pengundi mempunyai kecenderungan dalam memilih parti tersebut. Hal ini dikatakan demikian kerana dapat dilihat dari segi manifesto yang dekat di hati pengundi. Selain itu, terdapat pengikut baru dalam Parti PH seperti Parti MUDA. Faktor pengundi mengundi Barisan Nasional (BN) dalam PRU 2022 adalah kerana memartabatkan bangsa Melayu. Di samping itu juga, parti tersebut merupakan parti tertua yang memerintah negara. Jadi, terdapat pengundi tersendiri dari turun temurun yang seterusnya diwarisi hingga ke generasi kini.”

(Mohamed Hafizal Haji Mohamed Shah 22 Mac 2023)

5. Rumusan dan Cadangan

Secara keseluruhannya, setiap individu mempunyai gelagat atau tingkah laku yang berbeza tidak kira bangsa, agama mahupun kawasan sama ada bandar atau luar bandar. Kajian ini dapat memperlihatkan faktor pengundi memilih sesebuah parti sama ada Perikatan Nasional (PN), Pakatan Harapan (PH) dan Barisan Nasional (BN) di kawasan DUN Tanjung Lumpur. Gelagat pengundi ini merangkumi penyertaan politik, persepsi politik, pengetahuan politik dan kefahaman politik. Penyertaan politik merupakan keterlibatan warganegara dalam membuat keputusan, melaksanakan keputusan, mempengaruhi proses pengambilan keputusan dan keterlibatan aktif maupun keterlibatan pasif setiap individu dalam sistem politik. Pengundi juga diberikan hak kebebasan bersuara dalam melontarkan pendapat berkaitan keadaan politik pada masa kini. Persepsi politik pula merupakan proses yang melibatkan pemilihan, penerimaan pengorganisasian dan saluran maklumat yang diakses berdasarkan keadaan persekitaran. Penggunaan platform digital merupakan salah satu contoh yang mempengaruhi tingkah laku pengundi dalam membuat keputusan bagi memilih kerajaan yang mencirikan calon dan parti politik. Contohnya, media sosial seperti *Facebook*, *Tiktok* dan *Instagram* yang mendedahkan isu semasa mengenai parti politik. Pengetahuan politik pula adalah berkaitan dengan cara pemerintahan yang menetapkan kerangka dasar dan hala tuju negara. Kefahaman politik merupakan pengetahuan tentang isu politik dan perkembangan politik yang boleh mendatangkan impak yang begitu signifikan kepada kualiti sistem

demokrasi Malaysia. Oleh itu, setiap pemilihan sesebuah parti perlu mengambil bahagian dalam penyertaan politik, persepsi politik dan pengetahuan politik supaya tidak membuat keputusan yang salah untuk memilih pemimpin negara. Pada masa yang sama, kajian ini dilihat penting kerana dapat memberi pendedahan kepada masyarakat dalam bidang politik di Malaysia.

Rujukan

- Alex Marland & Tom Flanagan. (2013). Brand New Party: Political Branding and The Conservative Party of Canada. *Canadian Journal of Political Science* 46(4): 951-972.
- Azman Mahadi, Mohd Fuad Mat Jali & Junaidi Awang Besar. (2016). Tingkah laku pengundi dan faktor kejayaan Barisan Nasional: Kajian kes FELDA Kuala Krau. *Geografia Online: Malaysian Journal of Society and Space* 12(9): 126-137.
- Amani Dahaman. (2011). *Penyelidikan Pendidikan*. Tinjauan Literatur/Sorotan Kajian.
- Balqis Farhana Ismayuddin & Junaidi Awang Besar. (2022). Pandangan Belia Terhadap Isu Sosioekonomi dan Politik di Kawasan Peramu Jaya, Pekan, Pahang. *Jurnal Wacana Sarjana* 6(4): 1-20.
- Dita Setya Budi P. & Luthfi Muta'ali. (2015). Kajian Geografi Politik Terhadap Perubahan Perolehan Suara Partai Demokrat Pada Pemilu 2009 dan 2014 Kabupaten Pacitan. *Jurnal Bumi Indonesia*. 158-167.
- George Alarcon. (2012). Diaspora and Democracy: Overseas Absentee Voting, Elections, and The Challenges for a Working Democracy in Philipines. *7th Annual International Conference Multicultrerism and Social Justice: Democracy and Globalization, History and Globalization*.
- Junaidi Awang Besar. (2017). Tingkah Laku Pengundi Dan Pilihan Politik Di Kawasan Parlimen Pasir Mas, Kelantan. *Geografia Online: Malaysian Journal of Society and Space* 13(3): 97-111.
- Junaidi Awang Besar. (2018). Analisis faktor geografi terhadap pola pengundian dalam Pilihan Raya Umum (PRU) Ke-14, 2018 di Malaysia. *International Conference on Social Sciences And Humanities (ICOSH-7) 2018*. Anjuran dan Tempat Persidangan: Fakulti Sains Sosial dan Kemanusiaan (FSSK), Universiti Kebangsaan Malaysia (UKM), Bangi, Selangor. 12-15 November.
- Junaidi Awang Besar. (2019). Perubahan politik dalam pilihan raya umum (PRU) ke-14, 2008 di Malaysia. *Geografia Online: Malaysian Journal of Society and Space* 15(4): 220-232.
- Junaidi Awang Besar. (2022). Pengaruh Geografi Dalam Pilihan Raya Kecil (PRK) 2020 Di Kawasan DUN Chini, Pekan, Pahang. *International Journal of Law, Government And Communication (IJLGC)* 7(29): 370-387.
- Junaidi Awang Besar. (2023a). Pilihan Raya Umum Malaysia ke-15: Pola sokongan pengundi berdasarkan faktor kewilayahan. *e-Bangi: Journal of Social Sciences and Humanities* 20(1): 168-180.
- Junaidi Awang Besar. (2023b). PRU-15: Tiadanya parti politik yang menang majoriti Mudah 112 Kerusi Parlimen untuk membentuk Kerajaan Persekutuan Malaysia. *International Journal of Law, Government and Communication* 8(31): 97-121.
- Junaidi Awang Besar & Mohd Fuad Mat Jali. (2016). Peranan Pengundi Melayu Dalam Pengukuhan Hegemoni Politik UMNO Dalam Pilihan Raya Kecil DUN Tenang, Kerdau dan Merlimau. Dlm. Maslida Yusof, Mohamad Rodzi Abd Razak,

- Mohammed Azlan Mis & Yusmilayati Yunos (Editor). *Hubungan Malaysia-Indonesia: Sejarah, Politik dan Keselamatan*. Bangi. Universiti Kebangsaan Malaysia.
- Junaidi Awang Besar, Abdul Muein Abadi & Ahmad Afif Zulkipli. (2018). Gelombang rakyat dalam Pilihan Raya Umum (PRU) Ke-14, 2018 di Malaysia. *Seminar Antarabangsa Ke-7, Arkeologi, Sejarah dan Budaya di Alam Melayu (ASBAM 7, 2018)*. Tempat: Jayakarta, Lombok Beach Resort & Spa, Nusa Tenggara Barat, Indonesia. Anjuran Bersama: Universitas Hasanuddin (UNHAS), Makassar, Sulawesi Selatan, Indonesia; Institut Alam dan Tamadun Melayu (ATMA) Universiti Kebangsaan Malaysia (UKM) dan Universitas Islam Al-Azhar, Mataram, Indonesia. 28-29 Julai.
- Junaidi Awang Besar, Rosmadi Fauzi, Amer Saifude Ghazali, Mohd Azlan Abdullah, Mazlan Ali & Ahmad Rizal Mohd Yusof. (2014). Pilihan Raya Umum (PRU) 2013 di Malaysia: Suatu analisis 'Tsunami Politik Bandar'. *Geografia Online: Journal of Society and Space*. 10:28-38
- Junaidi Awang Besar, Mohd Faidz Mohd Zain, Mohd Fuad Mat Jali, Ahmad Rizal Mohd Yusof & Muhammad Hazim Abd Ghani. (2015). Calon lama vs calon muda dalam Pilihan Raya Kecil kawasan Parlimen Rompin dan Parlimen Permatang Pauh 2015. *Kertas Kerja 2nd International Conference on Human Sustainability (INSAN 2015)*. The Royale Bintang Resort and Spa, Seremban, Negeri Sembilan, Malaysia. Faculty of Science, Technology and Human Development, University Tun Hussein Onn Malaysia (UTHM), Batu Pahat, Johor. 19-20 Oktober.
- Khalida Najwa Khairuddin. (2021). Keperluan pengundi untuk mengundi di kawasan tempat bekerja: Kajian kes di kawasan Dewan Undangan Negeri (DUN) Tras, Raub, Pahang. Latihan Ilmiah. Program Geografi. Fakulti Sains Sosial dan Kemanusiaan. Universiti Kebangsaan Malaysia.
- Michael Johnston. (2013). More than Necessary, Less than Sufficient: Democratization and the Control of Corruption. *Social Research* 80(4): 1237-1258.
- Muhamad Nadzri Mohamed Noor. (2019). Persaingan PRU ke-14 di Pahang Pengekalan Status Quo Melalui Pertembungan Tiga Penjuru. *Geografia Online: Malaysian Journal of Society and Space* 15(4): 122-136.
- Nor Shafika Johari. (2018). Politik Pilihan Raya dalam PRU-14 di Kawasan Dewan Undangan Negeri (N.10) Damak, Jerantut, Pahang Darul Makmur. Latihan Ilmiah. Program Geografi. Fakulti Sains Sosial dan Kemanusiaan. Universiti Kebangsaan Malaysia.
- Nurul Izzatie Wahab. (2019). Gelagat politik dalam Pilihan Raya Umum ke-14, 2018: Kajian kes di kawasan DUN (N.36) Pelangai, Bentong, Pahang Darul Makmur. Latihan Ilmiah. Program Geografi. Fakulti Sains Sosial dan Kemanusiaan. Universiti Kebangsaan Malaysia.
- Omar Othman. (2004). Orang Asli dalam politik dan pembangunan di Pahang. Tesis Sarjana Sains, Universiti Putra Malaysia.
- Pandian S. (2014). University students and voting behaviour in general elections: Perceptions on Malaysian political parties leadership. *Asian Social Science* 10(18): 225-231.
- Rohana Yusof. (2003). *Penyelidikan Sains Sosial*. Pahang. PTS Publications & Distributors
- Patton M.Q. (1980). *Qualitative Evaluation and Research Method*. London
- Sabitha Merican. (2005). *Kaedah Penyelidikan Sains Sosial*. Selangor. Prentice Hall/Pearson Malaysia.
- Thananithichot, Stithorn. (2012). Political Engagement and Participation of Thai Citizens: The Rural-Urban Disparity. *Contemporary Politics* 18: 87-108.

Tumasjan, A., Sprenger, T. O., Sander, P. G., & Welpe, I. M. (2012). Predicting Elections with Twitter: What 140 Characters Reveal about Political Sentiment. *Conference on Weblogs and Social Media*. California. Menlo Park.